

MP Supongmeren-i Sainik School Punglwa semdang



MP Supongmeren-i Sainik School Punglwa semdangba mapang tangokba noksa angur.

Dimapur, Rongjui/Sept. 09 (TYO): Nagaland nungi Parliament züngsem S Supongmeren Jamir-i September 9, 2024 nü Sainik School Punglwa, Nagaland semdanga iba reju aser yangji azüngba cadets temi kodanga mamashitsüsa maitsü yutsü.

Iba mapang pai school indang annual magazine, Vibrant Strings 2023-24 sayaja liasü.

MP Supongmeren tonga aruba mapang Colonel Arvind Nautiyal, Principal, Sainik

School Punglwa ajanga pelashishia agizük aser tasü tait sepai temi takum bendanga agütsüba nüngtem nung yanglua aliba Amar Jawan memorial nung narö yutsü.

Independent NCC Coy indang cadets temi guard of honor ajanga pa agizüka liasü aser school indang otsü pa den lemsatepa liasü.

Iba mapang MP S Supongmeren Jamir-i cadets tem den temulung nung kongshia o jembidang tashi

angaba, lenir ama aliba aser linük meimba ajanga tajangzük anguba aser linük tarutsü yangerba indang ashi.

Iba sentong nungsa sobaliba sentong tatsüka agia cadets temi pei sempet sayua school nung cadets dang lenla ajaklen terenlok asoshi shisatsü aser training agütsüba sayua liasü.

Tepela temaitsü school principal Colonel Arvind Nautiyal-i MP Supongmeren Jamir nem school indang memento ka agütsü.

Directorate of Art & Culture-i senotsü teyari atema application meshir

Dimapur, Rongjui/Sept. 09 (TYO): North East Zone Cultural Centre, Dimapur kübok 'matching funds' atema pei wadang nung mapa tajung inyaba aser resources alir Voluntary organizations/ Research Scholars/Universities/ colleges dang nungi Directorate of Art and Culture, Kohima ajanga application meshir.

Scheme ya Himalayas 2024-25 indang sobaliba wazüka aser tajungba kuma terenlok asoshi senotsü teyari agütsütsüba lir.

Applicant ya India senso asütsüla aser pei state lisopur asütsüla. Organization/ Research Scholars/Universities/ Colleges temi application

terenem den nüngdakba documents/osang State sorkari ajanga NEZCC Dimapur nem scrutiny atema agütsütsüla.

Research Scholars, Universities aser Colleges temi parnoki indang application ya U.G.C ajanga NEZCC, Dimapur dangi forward asütsüla.

Merenem aliba application (SGR mesüra nüngdakba documents maliba) tem expert committee ajanga evaluation atema meyoktsü.

Lenla ajak nung renemer aliba application ya Expert Committee ajanga senden nung asadangtsü, aser iba committee ya Ministry of Culture ajanga tentettsü.

Application Forms aser danga osang tejangja ya Office of the Directorate of Art and Culture/ Affairs, Government of Concerned State mesüra Shilpgram, Panjabari, Guwahati aser Headquarter Office, Dimapur nungi meshitetsü.

Forms ya NEZCC Website [https:// nezccdimapur.org.in](https://nezccdimapur.org.in) and [# Niuland DPDB senden menogo](https:// www.facebook.com/ NEZCC nunga angutsü.</p>
<p>Application ya October 31, 2024 tashinung agütsütsüla aser iba sülen aruba application magizüktsü.</p>
<p>Kuli kecha magütsüi application agizüktsü mesüra magizüktsü Director, NEZCC dak tashi lir.</p>
</div>
<div data-bbox=)



Niuland DPDB senden aliba mapang tangokba noksa angur.

Dimapur, Rongjui/Sept. 09 (TYO): Ita shia amenba Niuland District Planning & Development Board (DPDB) senden September 9, 2024 nü Deputy Commissioner, Niuland indang Conference Hall nung mena liasü.

Iba senden ya Additional Deputy Commissioner, Niuland, S. Athsangla lenisüba kübok amen aser lai taoba senden nung lemtetba lepa repringhia liasü.

District Administration ajanga District nung Sub Divisional Education Officer aser High School tem indang Head Master tem den shisa agitepba sülen school tajungba

kuma renlokdahtsütsü mechi Administration Officers temi Government High School tem adopt asütsü lemtet.

Senden nung ken o balala benoka jembi aser Niuland District nung State Disaster Response Force (SDRP) Personnel yoktsü proposal benokba agizüka liasü.

Society registration aser renewal indang jembi aser kanga junga asadangba sülen non-performing society tem renew masütsü lemtet.

Board-isa department ketdangsurtem tekeratiba nung yokdahtsütsü aser DRDA, Treasury Office, Post Office,

Transport, Labour & Employment, Fire & Emergency, Soil & Water Conservation, Water Resources, Evaluation, Economics and Statistics, Home Guard & Civil Defence, Urban Development, IT & Communication aser New & Renewable Energy ama department balala indang office yanglutsü indang jembi approval atema pei department dangi yoka liasü.

Iba senden nung Social Welfare Department nungi ketdangsur temi par department ajanga district nung mapa inyakba indang osang agüja liasü.

MENUNGRA BILEMTETTER



PONANUNGLA (Akhoya) 15.09.1944 - 10.09.2023

Temeim Ojala, Onüla aser Otsüla onok nungi pilar küm ka rentetakasa Lai sarasademtsüba aser la sayu o agi tanü tashi ozü len anidang, kanga rongjenseta aser menungraa bilemtetter.

- Kinungertem

NSCN/GPRN ajanga Thungchamo Mozhui asükhu lemsatep

Dimapur, Rongjui/Sept. 09 (TYO): Wokha district kübok Longtsung yimtsüng nungi Asür Wopanso Mozhui jabaso Thungchamo Mozhui Tatar (UT) anojungi September 8, 2024 nikongdang 5:00 ako meta duty inyakdang Doyang anasa asüba atema mang ayimer, ta GPRN/NSCN sangdong ka ajanga ashi.

Pa Lotha Region nung tenzükdang mapa nung bendanga

agütsüba atema GPRN/NSCN kanga pelar. Iba den külemi GPRN/NSCN ajanga mangyimer kibong den asükhu lemsateper, shiri Naga Nation atema jabaso tajung ka agütsü.

Pa tasünü tashi linük meimba mulungsentüsü nung Naga lima tenzükogo. Pai asüba ajanga tazüing adokba jangja-jangja metettsü aser asüngtsü tasak asütsü, ta sangdong ajangasa ashi.



Livingstone Foundation International, Dimapur nung September 9, 2024 nü Awareness Campaign On National Clean Air Programme atema Inter-School Competitions alidang Model Exhibition Competition nung mezüngbuba jenjang nguteter Bethesda Hr. Sec. School, Dimapur nungi kaketshir nem Chief Executive Officer, Dimapur Municipal Council, Thungchanbemo Tungoe, NCS ajanga sempet agütsüba noksa nung angur.

Kohima DPDB senden September 17 nü amentsü

Dimapur, Rongjui/Sept. 09 (TYO): Ita shia amenba District Planning & Development Board, Kohima senden September ita atema September 17, 2024 anüngdang 11:00 ako nungi tenzük DPDB Conference Hall, Kohima nung

amentsü, ta Deputy Commissioner, Kohima, Kumar Ramnikant-i sangdong ka nung metetdahtsü.

Anungji iba senden nung züngsem ajak medema arua adentsü ayongzüker, ta sangdong ajangasa ashi.

PM Modi-i Abu Dhabi Crown Prince, Sheikh Khaled ajuru



September 09, 2024 nü New Delhi nung Hyderabad House nung Ato kilonser Narendra Modi-i Abu Dhabi nung Crown Prince, Sheikh Khaled bin Mohamed bin Zayed Al Nahyan ajurudang tangokba noksa nung angur.

New Delhi, Rongjui/September 09 (Agencies): Hombarnü New Delhi nung aliba Hyderabad House nung Ato kilonser, Narendra Modi-i Abu Dhabi Crown Prince, Sheikh Khaled Bin Mohamed Bin Zayed Al Nahyan agizükba sülen pa den senden amen.

Lenir anati India aser United Arab Emirates (UAE) na tsüingda asalentong tsütsü lenla balala nung tesendaktep onüktem nung o lemtepa liasü.

Sheikh Khaled bin Zayed Al Nahyan New Delhi tonga aruba mapang nung Union Minister of Commerce & Industry, Piyush Goyal-i pa agizüka liasü.

Modi aser UAE lenir na senden amenba sülen pai

Rajghat semdanga Mahatma Gandhi nem akhüm agütsüba den naro toktsü.

MEA otongdar, Randhir Jaiswal-i X ajanga, “Tesendaktep tsütsü alizüing tasen ka tongtetogo. Sheikh Khaled bin Zayed Al Nahyan-i tang mezüing India official süa semdanga Delhi tonga aruogo. @CimGOI @piyushgoyal-i pa agizüka liasü,” ta metetdaksü.

UAE leniri September 9-10 anogotem nung Delhi semdanga mapang nung pai linük Tir, Droupadi Murmu-a ajurutsü aser Mumbai nung ayongzükba business forum ka nung adentsü.

MEA-i sangdong ka ajanga, “India aser UAE na akhidang

nungi tesendaktep junga lir. Testüba küm ishika tsüingda India aser UAE na tsüingda Comprehensive Strategic Partnership kübok yimtenren, shishilembaba, investment, connectivity, energy, technology, shisaliok aser sobaliba tsütsü tesendaktep kanga junga kümogo. Tang Crown Prince-i semdanga ajanga maneni India-UAE tsüingda tesendaktep tashi taiba akümtsü aser lenla tasen aika nung amalitepa inyaksü asoshi maongka tasen angutsü,” ta metetdaksü.

Taküm February ita nung Ato kilonser Modi-ia UAE semdanga UAE Tir, Sheikh Mohamed bin Zayed Al Nahyan den senden mena liasü.

India tenüing menüktsütsü atema Rahul-i bendanglen semdang: BJP

New Delhi, September 09 (Agencies): Lok Sabha nung opposition lenir, Rahul Gandhi-i Texas nung BJP aija jembiba sülen Hombarnü Bharatiya Janata Party (BJP)-i pa sashia aitsüogo.

Congress lenir Rahul Gandhi-i anogo asemnü US semdangba mapang nung pai, RSS-i India ya tangatetba ka dang aliba linük ama bilemer, ajsüaka Congress-ibo India ya tangatetba aika aliba linük ka ama bilemer, ta jembia liasü.

BJP lenir aser Union minister, Giriraj Singh-i, India tenüing menüktsütsü atema dang Rahul Gandhi-i bendang linüktem semdang, ta aitsü.

Paisa, linük ashioktsür kati RSS ji mangatetsü; RSS indang tangatetbatem metetsü atema Rahul Gandhi aiben asotsüla, ta ashi.

“Pai pa tetsü (Indira Gandhi) dangi otetsüsa technology kar danga ali asübo pai la dangi oa RSS indang asüingdangtsüla

mesüra puti otsü bushitsüla. RSS metetsü atema Rahul Gandhi aiben asotsüsa akümtsü. Linük ashioktsür kati RSS mangatetsü. Bendangleni oa linük aitsürtemi RSS mangatetsü,” ta BJP lenirisa metetdaksü.

“India tenüing menüktsütsü atema dang Rahul Gandhi-i bendanglen semdang ama reprangteter,” ta Singh-isa shisem.

‘Yuvraj’ Rahul Gandhi lenisüba kübok linük nung nüburtemi tang agi tasembenbuba Lok Sabha elections nung Congress party sendokogo, ta paisa metetdaksü.

“India tenüing asangtsü melen pai bendangleni oa India aitsür aser China tenüing asanger, tsükchir linük tenüing asanger. Pai China nunger sen nungi tajangzük ngua bendangleni oa China tenüing asanger ama reprangteter,” ta paisa metetdaksü.



September 09, 2024 nü Jammu nung BJP MP, Anurag Thakur aser party candidate Arvind Gupta nati Jammu and Kashmir Assembly elections atema nüboyimdang tangokba noksa nung angur. Hombarnü Gupta-i nomination file süogo.

West Bengal nung doctor tem longkak aitiba ajanga nisung 23 süogo

New Delhi, September 09 (Agencies): Tawa Kolkata nung aliba RG Kar Medical College & Hospital nung postgraduate doctor tetsür ka tashiyim amshia raksatsür tepsetba ken o Hombarnü Supreme Court nung angadanga mapang nung West Bengal state sorkari Supreme Court dang, doctor temi longkak aitiba ajanga tang tashi nung nisung 23 süogo, ta metetdaksü.

Doctor tetsür ka tashiyim amshia raksatsür tepsetba anema doctor temi longkak aiter.

West Bengal sorkar tenüing nung senior advocate, Kapil Sibal-i state health department-i renemba report ji Chief Justice, D Y Chandrachud-i aniba bench ka nem metetdaksü.

Iba bench nungji Justices- J B Pardiwala aser Manoj Misra nata densema lir.

Sibal-i bench dang, “Report ka renemogo. State health department-i report ka renema agütsüogo. Doctor temi longkak aitiba ajanga nisung 23 süogo,” ta metetdaksü.

Doctor tetsür ka tashiyim amshia raksatsüba sülen ken o benoktsü atema menoba atema August 22 nü Supreme Court-i Kolkata Police sashia aija liasü.

Supreme Court-isa, iba tatalokba ya kanga taoktsüka lir, ta shia iba tatalokba tarensen aser mapang tejanga asüingdanga liasü.

Tamalen iba ken o angadanga mapang nung Supreme Court-i West Bengal sorkar dang August 14 nü RG Kar Medical College and Hospital raksatsüba aser raraba

tatalokba indang bushisüingdanga report court nem agüjang, ta tuyua liasü.

Supreme Court-isa doctor tem aser healthcare workers taküm kümzüksü atema inyakyim tasen benoktsü asoshi züingsem 10-i akümba National Task Force (NTF) ka tentetogo.

Doctor ka raksatsür tepsetba sülen FIR kanga menor ang

benokba aser nisung meyrjang aikati sorkar meyong hospital raksatsüba atema Supreme Court-i Bengal sorkar sashia aitsüogo.

Iba hospital nung junior doctor ka tashiyim amshia raksatsür tepsetba sülen August 9 nü hospital indang seminar hall nung tasüangji anguba sülen linük tesem ajaklen doctor tem densema nüburtemi longkak sashia aita liasü.



September 09, 2024 nü New Delhi nung Supreme Court-i Kolkata nung aliba RG Kar Medical College & Hospital nung doctor tetsür ka raksatsür tepsetba ken o angadanga mapang nung Kolkata nung kasa hospital nung junior doctor temi ken o angadanga live repringdang tangokba noksa nung angur.

IDBI BANK
APPENDIX IV [RULE 8(1)]
KIOJEN AGIBA NOTICE
(For Immovable Property)
 Securitization and Reconstruction of Financial Assets and Enforcement of Security Interest Act, 2002 (54 of 2002) aser Security Interest (Enforcement) Rules, 2002 kübok Section 13(12) aser rule 3 nung agüja aliba tashi amshia tsüingdanglen sign süa alir **IDBI Bank Limited** nung authorized officer-i **11.09.2023** anogo nung SARFAESI Act nung Sec 13 (2) kübok Demand Notice ka ajanga applicant/sen apur **Shri. Divakar Kachari, Proprietor of Offset Delta** dang notice nung shia aliba ama **02.07.2023** anogo tashi nung **Rs. 22,70,500.34/- (Twenty two lakhs seventy thousand five hundred and thirty four paise only)** aser iba sülen sen tetemlok ajakji notice anguba anogo nungi tenzüka anogo 60 tsüingda agüjang ta metetdakja liasü.
 Sen apuri senji magütsütem, anungji sen apur aser public dang tsüingdanglen sign süa aliri iba Act nung section 13 kübok sub-section (4) aser Security Interest (Enforcement) Rules, 2002 nung rule 8 nung agüja aliba tashi amshia **2024 küm September 6 anogo** nung tsüingdanglen shia aliba kiojenji agiadokogo, ta sangdonger.
 Talisa sen apur aser public dang iba dak sendakba kiojen atema inyaksangshi kecha masütsü metetdaksür, mesüra **IDBI Bank Limited-i 02.07.2023** anogo tashi nung adokba **Rs.22,70,500.34/- (Twenty two lakhs seventy thousand five hundred and thirty four paise only)** den külemi sen tetemlok ajak agitsü. Sen apur dang iba Act nung section 13 kübok sub section (8) nung ajemdaker mapang shidak nung kiojen alangzüksü metetdaksür.
KIOJEN OSANG TEJANGJA:
(A) Mortgaged asüba kiojentem
 Patta No. 859, Dag No. 66 / 964, Mouza No. 3, Block 8 nung tasazük 00B-03K-06Ls nung aliba kiojen aser yangji aliba ajak, aser kiojen temeket nung yamai lir: North tsütsülen gari lenman, South tsütsülen Approach Road, East mesüra iba tsütsülen Approach Road aser West mesüra iba tsütsülen: Babulal Kachari. Iba kimong nung ali nung amenoka aliba kiojen ajak densema lir.
 Date: 06.09.2024 For IDBI Bank Ltd.
 Place: Dimapur Authorised Officer



TIR YIMYIM YIMOBILEM (EDITORIAL)

DIMAPUR SANGTENNÜ, SEPTEMBER (RONGJUI) 10, 2024

Atemzükler meinyaktetba ana, ILP & RIIN

Iba putu tasenba nung Nagaland government-i inyakba mapatem repringdangra, mapa temela shima-shima inyaker mapa tasak-tasaktembo temulungtetba tulu agi inyaksü amai atemzükli meinyak odang toktsüli ta asüba tamakok aika angur. Item tamakoktem rongnung Nagaland ajungtsü atema kanga shitak ka rajema tatar senden nung ken o süoka jembir lemtetba ser nung, tejembia mejembi amai toktsüba tongtibang mapatong anaji, ka Nagaland nung tanga district-tem nung amshiba ama Dimapur district nunga ILP amshitsü ta ozüng latetba mapa kuma meinyaktetba aser ano kaji, Nagaland nung bendanger nem sensosangertem mamoksepdaktsütsü atema Nagaland senso o bendanger na bendangtsü asoshi Register of Indigenous Inhabitants of Nagaland (RIIN) inyakyim tenzüksü atema taoba Nagaland Chief Secretary Wt. Banuo Z Jamir menden ser luden ka shima kanga mapa bolua inyakdaksür, parnokiyakba mapa nung tzüzü shiochtsü ama kümdaktsür yutsüba ya asütsü. Atangji, tang putu tasenba ya Nagaland nung alir Naga nungertem asoshibo benjongmung putu aru amaika benjong-benjong agi tenzükba tang tashi manentet, tzünglua arung, anentsüa alung mesüra anüa puang, benjong amungtsüba sentongbo anogo shia tajungba aser tuluba puraloka amongtsü atema kanga meranga inyakba angur. Aji junger saka ibaji Dimapur district nung ILP amshi tenzüksüba dang nungi tongtibangba aser tasakbabo masü. Ibaji dang masü saka Naga nunger asoshi putu tasenbai bener arutsüba asentenshi kaji, Naga nunger saisapong nung jangradaktsütsü asoshi state stadium aser cricket ground yangluba nungi tenzükler mapang-mapang shia tangar state-tem nungia arua shilem agitsüsa asayamong tapu balala ayongzüka asayaba angur. Aja kanga junger saka state stadium aser cricket ground na prongla merenemtetbaji dang topur majung angur. Atangji, Nagaland asoshi saisapong nung renloktsüjia tongtibang saka asenoki medemdangdi süra saisapongjia Dimapur nung ILP amshitsü aser Nagaland nung RIIN inyakyim tenzüksüba rongdak nungdaktem dang nungibo tongtibangbabo masü. Aji oda, benjong amungba aser asayamong sentong ayongzüka mungtepba nungji tetsübu tarendak kecha mali, anungji nüken belemtsüa mali saka tang aser tarutsü Naga lima aser lisopurtem kümzüka ayutsü atema ILP aser RIIN inyakyim shitak tenzüka ao nungbo, atangji, item sentongtemji anemer aika adoktsü, kechiyong item inyakyim jagi bendanger aika Nagaland nung inyakyim mesademtsü. Ajisuaka, kodang küm 64 jakdang Nagaland state akümertemi injang lendong ajak tizükteta pei taküm agi tendanga India government den telemtetba agiba indang bilemdangdir, atangji, parnokji tasütait aser tarutsü Naga nunger asoshi nukla tajung akaba lenirtem liasü ta angatetsü. Tanü jungli-mejungli item tasütait lenirtemi pei taküm aoa mesasai Nagaland state akümba agi Minister aser MLA-temi anir asenok ajak tangar temeteter kin terabo mesüka alir. Atangji, Nagaland state akümba agi Nagaland akümer telok Naga Peoples' Convention nung mendenbuba Dr. Imkongliba takümbo Nagaland asoshi tenla aküm. Tanü Nagaland nung yimten lenirtem dak Dr. Imkongliba nungertem dak aliba tangatetba shisatsü aser tasütait tanela lilasang, parnokia Naga nunger asüng tajungba jenjang ka nung lia aotsü asoshi yimten nung lemtetbatembo marendaki mapa kuma inyak tenzükla. Tanübo akhi Dimapur agi district asem kümogo, anungji Dimapur nung dang masü saka Chümoukedima aser Niuland district na prongla nung ILP aser RIIN-a mapa kuma inyak tenzültsüla. Joko, asenokbo tetsübu aser tarendak agi asen lima kümzüksü sentonga metenzükter benjong-benjong dang mongtepa lia, Bangladesh len nungi bendangertem Nagaland-i nungoka aittsü ama tensa mapang ka arudang, Dimapur nungbo Dimapur police-i Railway station mita nükdagi aser parnokiyakba train nungi arurtem ket nung ILP masü saka Aadhar card mesüra voter ID card ama meshia senso ayak jangjashidagi. Ajisuaka, aji agibo asen lima bendanger ket nungi meküzmüktetsü. Joko, yimten nung lemteta aliba ama Dimapur railway aser airport nung dang masü saka yimti süngküm ajak nung ILP mitdak tesem jungjunga mesemteter akhüm keta tenzüksüla aser yimti tiyong nung alirtem atema RIIN sentong mapa akümtsüla.

OLEMSABANG

ALIMA AJAK AJANGZÜKER PEI TAKÜMASER TANELA SAMARA KECHI AJANGZÜKTSÜ

~ L. Kika Pongener.

Alima nung mimchir ajaki asenok iba lima nung ya teti dang alitsü ama bilemer, aser yamaji bilemba agi putu aika atema sentong yanglur aser rongsena rizüngtsü merangteper. Iba lima nung ya asen jangradema lir külenang, ano asen chirnur/semchisemnurtema asen amaji alitsü ama bilemer. Ajisuaka, asenok shinga-ia asüngji kechi asütsü'ar, kecha meteta maka...!!! Asüng jagi asenok nem kechi bentsür arutsü'ar shingaia kecha meteta maka...!!! Kechiyong item ajakji asen teyanglur Tsüngrem ket nung lir. Tsüngrem o-i ashir..."Asüngji kechi adoktsü nenoki memetet. Nenok taküm kechi? Kechiyong kenpika angur aser sama-a aoba tangola, aji nenok lir" (Yakob-4:13-14). Alima lennir, sorkar tenzükler, yimden yimsusur, arogo, mungdang aser loktiliba balala nung lennirtem...Ashiko, karibo alima yimli tashi, sorkar tashi, yimden bangdak tashi aser lokti tashi ajakji teti, asen ket nung ammer alitsü ama bilema alitsü...Mesura tenzükba menden nungji teti asen dang amentsü ama bilema alitsü sudi. Ajisuaka, tensa mapang jagi kechi bentsür arutsü shinga-ia meteta maka.

Alima nung chuba menden, yimden yimli bangdak, arogo, mungdang aser loktiliba tilatiba tenzükba tashi nung kar künu, kar künu ta melentepa tenzükkyonga aotsü. Ibaji nisungi mulongba agi masü saka, Tsüngremi mapangji atakteta yuja lir. Kechiyong nisungibo teti asen dang kibur sunutsü, saka item ajakji asen shilem masü Tsüngrem shilem lir. Anungji tanü asenok koba telok nung tenzüka lidir liaka, asen nem nungloktsüba ketdangsuba mapa ajak nung Tsüngrem mulong achitsüsa, nuburi tamang kaatetsüsa, ochishia, meruk-meruka, tashishitsü meli-i tenzüksüla. Tanü aseni mapa tajung inyaka toktsüra, iba tsüngnepji putu aika asen chirnur/semchisemnurtemi melentepa senmang amangtepyonga aotsü. Ajisuaka, tanü aseni asen tenzükba lokti nung putu aika tarak mesamatsüsa, tansutsü mapa tamajung kar inyaka yutsüra, iba atakatem temenenji asen chirnur/semchisemnur tashi senmang amangtepa aotsü, aser asen tenzükba tsüngnepji kecha makatsü. Aji oda, asenok loktiliba nung tenzükba kum kwika tenzük (?) Küm aika/kümsuk (Term) aika tenzük asü (?) ta masü... Saka kechi koda tenzük (?)...Junga tenzük asü mejungi tenzük (?)...Iba-jiang kanga agi tongtipangba lir. Tsüngrem o-i ashir..."Onok tsüraburtemi temenen mena, aser joko mali, aser parnok tai temenen khu onoki abener" (Aiat-5:7) Iba amaji asen chirnur/semchisemnuri mashitsüsa asenoki asen tenzükba lokti nung ochishia mapa tajung inyaka toktsüdi.

Anungji nisung ajaki tanü ajung asa-a masü, tanü jangradema alitsüba asa-a masü, saka tarutsü putu nukla nung yur, mapa tajung inyaka toktsütsüla. Sorkar, yimden, arogo, mungdang aser loktiliba tashiji teti asen ket nung dangbo ammer malitsü, kenubo asen ket nungi tangari melenzüksü. Sorkar tenzükler tulartema suang, teti dangbo temaba menden nungji asen dang mener malitsü, yimden yimsusura suang, yimden yimli bangdak tashiji teti aseni ammer malitsü, aser lokti lennira suang, teti dangbo lokti tashiji asen ket nung ammer malitsü. Arogo/mungdang nung tenzükera suang, teti dangbo asen-sa tenzüka malitsü. Küm aika mapa/wadang balala nung tenzüka arur...taki-tarutsü rongsenbo aika benden, alima nungdakbo aika ajangzükter, kimong-lumong aika aliden, ki-o-jen tulu/tajung aika alidena/yancludena ayu. Bank aika nung sen aika benden...Saka pei taküm jenjangbo majangzükter ta sura kanga tesusatsüka asütsü. Tsüngrem o-i ashir... "Kechiaser nisungi alima ajak ajangzükler, pei taküm madokra, pai kechi ajangzüksü? Mesura nisungi pei taküm melen kechi agütsütsü? Atangji, alima rongsen aika dang nungia asen takümji kanga agi taoba lir. Rongsen aika benadena yutsür anjong tenari dang anu aluba ama asen taküm arishi anojungi, tapayutsüka tembangra koda tesusatsüka asütsü...???

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

East Timor linük nung Khristantemi Pope Francis agizük



September 09, 2024 nü East Timor yimtiba, Dili nung East Timor Tir, Jose Ramos-Horta-i Pope Francis agizükdang tangokba noksa nung angur.

September 09, 2024: Hombarnü Pope Francis East Timor yimtiba, Dili tonga aruba mapang nung Khristantem meyrjang aika adenshir pa agizükogo.

Dili nung nisung meyrjang aika adenshia lenmang tiplen nokdaker pa agizük.

Pope Francis-i Indonesia aser Papua New Guinea na semdangba sülen tang East Timor semdang aser tesüsa Singapore semdangtsü.

Pope tonga aruba mapang nung tayimtsü anendak linük Tir, Jose Ramos-Horta-i pa agizük.

Hombarnü Pope-i East Timor ketdangsertem ajuruogo aser Mongolbarnü tekülem sentong ka agitsü, aser iba sentong nungji nisung 700,000 shi adentsü imlar.

Pai anogo asemnü atema East Timor semdang.

Pope agizüksü jakdang East Timor Ato kilonser, Xanana Gusmao leniba nung nüburtemi yimti lenmangtem merükteta liasü.

Pope kati tesüsa Dili semdangbaji 1989 küm liasü. Iba kümji Pope John Paul II-i taoba mapang Indonesia-i atsümbanga aliba territory ya semdanga liasü.

Iba mapang nungji East Timor atema nüchiso takhangba agüja longkak aiterem rongnung putir, Francisco Barreto-a densema liasü.

Tawa pai, "Iba mapang nungji onoki nüchiso atema raratsüji onok temeden, ta jembitsü atema maongka ngua liasü," ta metetdaksü.

Pope-i tang agi tanabenbuba East Timor semdangtsü aliba atema nüburtemi kanga yongyaa liasü. Arrshi küm 72 putir, Barreto-i, East Timor-i sensaker linük ya yangertsü atema meranger, ta metetdaksü.

Anogo ishika jakdang pai, "Pope-i semdangtsü aliba ya Tsüngrem taochi ajanga lir," ta

phone ajanga osangbener nem metetdakja liasü. Putir Barreto ya hospital ka aser jail ka nung chaplain inyaker.

"Iba ya ajanga taküm tasen aser tashi tasen angur aser onoki iba linük tejakleni aotsü atema inyakba asüngsashitsü. Linük nung yimtenren aser rongsenkettzüng jenjang kanga mejungi lir," ta pai ashi.

East Timor ya küm aika Indonesia kübok liasü. Tesüsa UN-i ketdangsüa agiba 'referendum' ka ajanga 2002 küm nüchiso ngua liasü. Ajisüaka nütsüng million 1.3 aliba linük nung yimtenren jenjang junga mali aser ochimashi jenti lir.

East Timor nung Khristantemi küm aika tejaklen Pope John Paul II-i linük semdangba mamateter aser 2005 küm Pope John Paul II asüba sülen linüki asemnü pa atema mangyima liasü.

Tang Pope Francis-i East Timor semdangtsü lia Khristantemi pa agizüksü kanga mazüngi renemogo aser sorkaria Pope-i semdangtsü aliba atema dollar sen million 12 lezmüksü.

Pope Francis-i Indonesia aser Papua New Guinea na semdangogo aser pai maneni East Timor semdang aser tesüsa Singapore semdangtsü.

East Timor ya alima nung kanga sensaktiba linüktem rongnung densema lir. Linük rongsenkettzüng atema parnoki toztü aser gas saru nung metaloker, ajisüaka küm ishika tsüngda iba jenjang tamajungba akümtsü, ta mongintemi ashir. Kanga sensaker linük ka süaka Pope agizüksü atema sorkari dollar sen million 12 lezmüksüogo.

East Timor nung nütsüng shilem 42 bo below poverty line (BPL) kibongtem lir, anungji Pope Francis-i rongsenkettzüng aser loktiliba tebilemtsü onüktem-a jembitsüa akok.

September 4 nü Indonesia

Tir Joko Widodo lia Pope Francis-i linük nung yimsü balala amangertem tsüngda tarezmüktep aser yimjung nung alitsü tayongzükba agüja liasü.

Muslim nütsüng teimtiba aliba Indonesia linük nung lenir anati telongjem nüngdak, ta bangjema liasü. Pope-isa Indonesia nung yimtenren lenirtem dang yimsü nung ajemdaker alia oa inyakba anema nokdaksü ayongzuka liasü.

Nütsüng million 280 aliba Indonesia nung nütsüng shilem 87 bo Muslim nungertem lir. Linük temzüng nungbo yimsü temeden agüja lir, ajisüaka iba linük nung mapang shia Islamic kiralongrartemi timtem agütsür aser Khristantem reshikangshir.

ANO GO ABEN TSÜNGREM DEN

Asenok temeimi rongmesoba

O temeshi Oba, alimai na memetet, saka ni na metet; aser Nai ni yok ta item yagi metet: aser ni parnok nem Ne nung metetdaksü, aser ano metetdaksütsü, anungji kechi temeim agi Nai meim aji parnok dak alitsü, aser ni parnok dak alitsü.

Yohan 17:25-26.

Nai Tsüngrem yimlijü metetet; nai Tsüngrem yimlijü noktanger. Pa temeimi ne dak mekongshi tashi na Tsüngrem anasa alitsü makok. Kotaker Tebui Techir dang tatem maka temeimi meim. Tebui temenen lima temulung raksaa meimba Pa jabaso Pa taküm ajanga jungkai adoktsü. Tebui meimchir kümzüksü sentong atong aser Techiri mapaji agizük. Iba jagi Pa kangki dongi ani.

Yisui meimchir rongnung jajadang, Tebu temeimi par chir süngdaksü. Mashi temeim agi Pa kangki atutsüsa majungshitsü ta Yisui metetta liasü. Meimchir temeimi Pa taküm ajunga agi Tebui ashiba abensaa tashi angatsü makok ta Yisui angatetta liasü. Tebu tekümtet mapa sentong nung Pa taküm bendanga agütsütettsüsa Tebu temeimji dang tashi tait liasü.

Kasa temeimji nütsüngtem nema agütsütsü Yisui sarasadem. Tebui parnok nem agütsütsü aliba mapa atemaji tanga tajung shibaji teperi masü ta Yisui metetta liasü. Tsüngremer telangzübaji Par chir parnok dak lidaktsütsübaji liasü. Khristan ka asoshi pa temeimer agi sünger Tsüngrem den Pa mission nung malitsübaji tamakoktsü.

Pa temeimi sünga melira nai shinga dang Tsüngremi na yok ta kuli mesütettsü. Nai tangar dang tai metoktettsü aser talila mile moutettsü mesüra tangar asoshi tenla magütsütettsü. Item ajak inyaktettsü asoshi na mezüngbuba Tsüngrem temeim agi sünga alitsüla. Tebu aser Pa masadangtetba temeim bushiang; aji sür na ajanga tangar dang meimtsü Techir dang melaang.

Khristantemi 'National Week of Prayer' asoshi longjemer

September 09, 2024: Khristan denomination balala nungi Khristantemi 'National Week of Prayer' atema longjemer; National Week of Prayer ya October 12 nü tenzüksü aser October 20 nü tembangtsü, ta osang ka ajanga metetdaksü.

UK kübok linük pezü nungi Khristantem longjemer Tsüngrem dang tatok meshiba den külemi tanele asentenshi milak jangrutsü aser Yisui Khrista ajanga taküm aika melenshitsü asoshi sarasademtsü.

Iba sentong asoshi Orthodox Archbishop of London, Archbishop Angaelos aser Bishop of Winchester, Philip Mounstephen nung densema lenirtem aika longjemogo.

Archbishop Angaelos-i, "Sarasademba dak alaka asenok atema tashi tulutiba mali. Longjemer nokdakdi aser longjemer sarasademdi," ta metetdaksü.

"Kodang asenok longjemdir Kibuba asenok madak alitsü. Hopta ka piyong

sarasademba mapang nung asenoki asen linük atema sarasademdi aser tamangba yimsü temeden atema sarasademdi," ta paisa ayongzük.

Bishop Mounstephen-i, "Asenok nem tashi agüja lir aser asenoki tanela nung alima yanglusang dang sarasademdi aser temelenshi adoktsü, ta amanga sarasademdi. Asenoki sarasademdi," ta metetdaksü.

National Week of Prayer atema Open Doors UK & Ireland, 24-7 Prayer, CARE aser Evangelical Alliance densema Khristan organisation-a aika longjemogo.

Parnoki longjemer UK aser British Isles kübok region balala nung sarasadem sentongtem ayongzuka agitsü atema ajungshitsü.

October 16 nü nisung noklang aika London nung aliba Parliament anasa Emmanuel Centre nung adenshia linük atema Khristantemi longjemer sarasademtsü aser Tsüngremi maneni iba linük nung mapa

inyakba bilemtettsü, ta kasa osang ajanga metetdaksü.

Project coordinator, Kamesh Flynn-i, "Tesüiba hopta ishika tsüngda Khristantemi Arogo ka ama longjemer linük atema sarasademtsü asoshi ajemalua shilem agidar," ta metetdaksü.

"Denomination balala nungi süaka, nisung asem dang adenshiaka mesüra nisung 3,000 adenshiaka iba ya Tsüngrem dangi meyiptsü aser Pa maittsü jangjatsü asoshi UK atema kanga tongtibang mapang ka asütsü," ta Flynn-i metetdaksü.

Central London Catholic Churches nungi putir, Dominic Robinson-i, "Khristantem ama

onoki National Week of Prayer nung shilem agitsü atema nenok ajak jaoker. Asenoki Tsüngrem nüngdak, ta bilemtettsü,

Tsüngremer sempettem atema Pa nem tenüngsang agütsütsü aser linük atema tanela asentenshitsü asoshi Khristantemi longjemer sarasademtsü," ta metetdaksü.

